



**DIA MUNDIAL DI NO  
TABACO**  
Vaping ta miho cu  
sigaria?



**WWW.SOLODIPUEBLO.COM**



**SOLODIPUEBLO@GMAIL.COM**

# PARLAMENTO DI ARUBA A APROBA E LEY DI E PRIVATISACION DI RWZI



RWZI ta un di e retonan mas grandi cu Aruba tin despues di e  
pandemia di covid

Colombiano ilegal condena na 1 año y 6 luna di prison


## CACHO DI DOUANE A PARA TRAFICACION DI COCAINE SCONDI PA AUSTRALIA



## PUEBLO DI ARUBA TA INVITA PA BIN APOYA NOS MUCHA- Y HOBENNAN NA E APERTURA DI WEGANAN ESCOLAR 2024 DIASABRA, 1 DI JUNI



## HOBENNAN CU TA USA DROGA TA SIGIAUMENTA Y TA BIRANDO UN PROBLEMA INCONTROLABLE





## Prome Minister Evelyn Wever-Croes:

# PROME MINISTER TA DESMENTI ACUSACIONNAN FALSO HACI CONTRA SU PERSONA PA PARLAMENTARIO GERLIEN CROES

Diahuebs atardi, Prome Minister Evelyn Wever-Croes tabata den Parlamento pa trata e ley di RWZI. Durante e reunion aki, y durante un entrevista pafo di Parlamento, Parlamentario Gerlien Croes a lansa acusacionnan falso contra Prome Minister y su famia, indicando cu su persona ta purbando na pasa e ley aki lo mas lihe posibel, pa asina enrikese su mes y su famia mirando cu Arulex Trust ta e representante di e compania cu lo bay tuma over e proyecto importante aki.

Prome Minister a indica cu e acusacionnan aki ta completamente falso, y cu ta un situacion bochornoso pascucha un parlamentario hoben asina, saca tanto sushedad for di su boca, mustrandu asina cu e no ta nada diferente di partido AVP sino simplemente e "verlengde".

"Mi kier a enfatisa cu e acusacionnan aki ta falso, y cu cosnan sushi asina por sali solamente di un persona cu talbes tin envidia. Mi tata ta un hende di 82 aña, y ta un homber

respetu den comunidad pa locual el a haci pa Aruba y pa su carera profesional. Ya ta 2 aña cu el a baha cu pensioen, y 2 aña cu e no tin niun laso ni cu Arulex Trust Services, ni cu e bufete di abogado Croes Wever Ruiz. E nomber Croes ta keda den e nomber di bufete di abogado aki, pa respet pa tur e añanan di trabou cu mi tata a eherce. E fam Wever ta di señor Rudy Wever den felis memoria, cu a fayece na 2007, pero pa respet a mantene e nomber aki, miarndo cu nan ta esnan cu a funda e compania aki"



Prome Minister a splica.

Prome Minister a tuma su tempo pa splica e situacion actual aki cu prueba. Y mirando e hecho cu Parlamentario Croes a ripiti e palabranan aki

pafo di Parlamento, Prome Minister lo cana e caminda pa Ministerio Publico pa kehe pa difamacion y cuminsa un caso di rectificacion contra su persona.

## OE AZV ta informa:

# ENTRANTE 1 DI JUNI 2024 EHECUCION DI DERECHO RIBA LOGOPEDIA

Conforme e decreto nacional cu ta establece medidanan general di 29 di augustus 2023, y den cual ta stipula normanan tocante e derecho di asistencia logopedico, entrante 2 di september 2023 logopedia a keda concretisa den e cobertura di seguro AZV. Esaki ta un derecho tanto pa mucha como adulto. Logopedia ta e tratamento pa recupera, mehora of mantene e funcionamiento di oido, bos of organonan di papia. Adicionalmente logopedia por yuda cu e halamento di rosea y ora tin problema pa come, bebe of guli. Trayecto di negociacion

Tabata den e ultimo kwartaal di 2023 cu OE AZV a informa tur asegurado cu lo drenta un trayecto di negociacion cu e logopedistanan. Dentro di e

trayecto di negociacion a evalua continuamente e stipulacionnan di e Ley AZV incluyendo e forma con OE AZV lo ehecuta esaki. Tambe a tene cuenta cu e puntonan di atencion treci dilanti door di e propio logopedistanan. Contracto y procedura

Hunto a keda cla y entrante 1 di juni 2024 ta ehecuta e derecho riba logopedia. E ta nifica cu ora bo dokter di cas of especialista haya cu ta necesario; e por referi bo pa tratamento cerca un logopedista. Bo dokter di cas of especialista (= especialista KNO, especialista di mucha, neurologo, especialista di rehabilitacion, especialista di adulto mayor y den algun caso limita e especialista di pulmon y of e especialista di stoma, tripa y higra) ta manda -digitalmente- e

formulario di peticion pa e logopedista. E logopedista na su turno ta yena e datonan cu falta den e formulario di peticion y ta manda e peticion pa OE AZV. Una bes OE AZV ricibi e (formulario di) peticion, ta evalua esaki y tuma un decision.

Aporte propio

Pa cuido di logopedia ta existi un aporte propio di 10% di e tarifa. E aporte propio di 10% ta wordo paga na cada sesion y directamente cerca e logopedista. Conforme contracto e aporte propio di e asegurado ta Awg. 7,50 pa un sesion di 30 minuut of Awg. 15,00 pa un sesion di 1 ora.

Tratamento

E tratamento por wordo pidi pa e siguiente casonan: deficiencia



auditiva y deterioro di e funcion auditiva, trastorno di bos, trastorno di idioma, trastorno di articulacion, nasalidad, trastorno den e fluidez y ritmo di papia y comportacion anormal oral. Pa duna algun ehempel.

Un persona cu tin e malesa di Parkinson y dokter di cas ta wak cu lo tin mester di ayudo di logopedia. Of un persona cu ta cay bou di spectrum autismo. Of un persona cu a haya un atake cerebral ("stroke") y mester siña papia of guli bek.



## Minister Ursell Arends:

# ERA NOBO PA ASUNTO DI AWA SUSHI

30 di mei 2024 – Gobierno di Aruba a trata e ley di traspaso di e tres plantanan di RWZI (Rioolwater verzuiverings installatie), y e incinerador na Parkientebos pa e entidad nobo, Aruba Wastewater Sustainable Solutions N.V. E paso di e ley aki ta refleha e voluntad politico y compromiso pa trece cambio sustantivo pa mehoracion den maneho di desperdicio di awa preto.

Pa mas di dos decada e problema di RWZI a bin ta tuma un stoel secundario ora ta papia di prioridad. Na momento di a forma Gabinete Wever-Croes 2, a scohe pa crea un ministerio cu lo ta encarga cu medio ambiente y naturalesa. Como parti di formacion e partidonan MEP/RAIZ a acorda tambe cu RWZI ta un asunto di prioridad pa e gabinete nobo. Nan a bay di acuerdo cu ambos partido lo atende cu e asunto aki hunto. Asina RWZI a keda formalmente parti di e

cartera di Infrastructura (MEP), pero Ministerio di Naturalesa (RAIZ) lo keda directamente involvi den trece e solucion pa e situacion. A yama esaki “traha horizontal”. Minister Ursell Arends cu a tuma e cartera di naturalesa a insisti desde inicio cu e impaco ambiental no ta aceptabel y a persisti ariba e urgencia pa yega na un solucion na e planta di purificacion di awa preto, RWZI. Esaki sigur ta un tema cu mas biaha Minister Arends a bai parlamento p’e.

RWZI ya pa casi 20 aña tabata un urgencia nacional pa cual motibo Minister Arends a remarca hopi biaha cu no por warda mas. Mantencion a cay atras y e planta a bira chikito pa e volumen grandi cu e mester procesa. Apesar di e estado financiero fragil di Pais Aruba, a keda busca solucion pasobra inversionnan mester wordo haci pa no

solamente mantencion pero expansion. Tambe tin cu remarca cu Aruba su poblacion a crece drasticamente desde 1972 cual te aña cu a construi e planta di RWZI na Bubali.

Di e tres plantanan di RWZI, ta esun na Bubali ta carga e mayoria di e volumen di awa preto. RWZI Bubali a wordo diseña pa procesa 45000 m<sup>3</sup> pa dia, mientras cu awo e ta ricibiendo mas cu 8000 m<sup>3</sup> di awa pa dia, causando problema di capacidad serio. Ciudadanonan y bishitantenan di nos pais por wak y hole e consecuencia di e esaki. Similarmente e RWZI na Parkietenbos tambe a caba di surpasa su capacidad. P’esey ora den Parlamento a puntra, ki pura Gobierno di Aruba tin pa e ley aki pasa, e contesta ta claro, pa asegura ciudadanonan salud y nos medio ambiente.

Mayoria den Parlamento




a vota na favor di e ley, priorisando esaki como un iniciativa clave cu empuhe di Ministerio di Naturalesa. “Trahando den colaboracion entre ministerionan di gobierno ta haci mas eficiente pa nos adresa e asuntonan critico aki,” Minister Arends a menciona. Awo cu e ley a pasa, desperdicio di awa preto por wordo procesa pa recursonan sostenibel.

Gobierno di Aruba a actua cu prudencia y e enfoca riba solucionnan pa salvaguardia nos recursonan natural. Poniendo interesnan partidista un banda y

enfoca ariba e interesnan di Aruba su economia y medio ambiente. Ta importante pa remarca cu Aruba su medio ambiente tin impacto directo cu Aruba su unico pilar economico, Tursimo. Solucionando e peligro di RWZI lo tin efecto directo y positivo riba nos economia. Cu sosten di stakeholder di e sector turistico, sector priva y partnernan internacional, incluyendo finaciamento di Hulanda, Gobierno di Aruba finalmente por implementa plannan sostenibel pa soluciona e problema di RWZI.

## POLIS A DETENE SOSPECHOSO DI INTENTO DI ATRACO CU AGRESION

Diaranson atardi a drenta informe di cu un grupo di cacho riba caya a morde un persona banda di e supermercado na Sero Patrishi y e ta herida, mesora a dirigi tanto polis como ambulans na e sitio. Na yegada di e patruya a bin compronde cu un grupo di cacho a ataca y morde un homber di 73 aña lag’e ta sangra. Na yegada di e ambulans nan a atende e victima y a transporte pa hospital.







# Noticia di Corte

## HUES A DICIDI CU NA SEPTEMBER 2024 LO TRATA CASO ASESINATO CRUEL DI MIEMBRO DI CEA

– Diahuebs den oranan di merdia, e sospechosonan den e caso di asesinato cruel di e miembro di CEA, Sergio Maduro, a presenta dilanti Hues.

SOLO DI PUEBLO por a compronde cu e caso tabata pro forma. No a trata e caso sino a palabra cu na September 2024 lo trata e caso. E sospechosonan ta Bryan Jimenez (28) y Jennifer Gonzalez (39), kendenan a drenta den sala di Corte cu man y pia na boei. Por a mira cu e tata di e victima a presenta y a laga sa cu e kier busca abogado pa haci demanda di daño. ASESINATO CRUEL

E acusacion contra Gonzalez y Jimenez ta cu riba bispo di Pasco, 24 December 2023, a choca Maduro cu forza y despues draai su nek varios biaha di robz pa drechi. Tambe nan a cera

Maduro su garganta cu forza y despues push'e bent'e for di e auto.

Despues nan a pasa auto riba Maduro diferente biaha. Ta sospecha cu Gonzalez cu tabata e pareha di Maduro, a pidi Jimenez di mata Maduro door di priminti'e pago y a paga un adelanto tambe.

PSYCOLOGO Y PSYCHIATER LO EVALUA

Fiscal a propone na Hues pa e tratamiento di e caso tuma lugar dia 6 di September 2024, henter dia. Fiscal a bisa tambe cu lo bay manda un invitacion oficial pa e tata di e victima, pa e ta presente den Corte. Ta asina cu e tata a bisa cu riba facebook el a lesa di e caso y a dicidi di bay Corte sin cu el a haya invitacion pa esaki. Esey a pone cu awor Fiscal lo percura pa e tata haya invitacion pa ta presente pa haci demanda

di daño y tambe lo por expresa su mes riba e forma cruel cu a asesina su yiu homber.

Fiscal a bisa Hues cu ainda e investigacion ta andando. Abogado di Gonzalez, mr. D.Croes a bisa Hues cu su cliente ta un persona special y ta pidi pa laga haci investigacion pa determina si e por a planea e asesinato manera ta acus'e di dje.

Fiscal a bisa cu tin un raport di psychiater riba Jimenez y cu tin un psicologo cu lo bay evalua Gonzalez y esey lo por duna splicacion. LO TRATA CASO NA SEPTEMBER

Hues despues di a scucha Fiscal y abogado mr. D.Croes, a bisa cu e ta pospone e caso pa dia 6 di September 2024 cuminsando 8.30 di mainta.

**Minister Xiomara Maduro ta informa:**

## ARUBA TAMBE PRESENTE NA' CREATIVE COMMONS' SU

## SESSIONNAN DI CULTURA HABRI Y PATRIMONIO NA PORTUGAL

**Sr. Peter Scholing a haci bon uzo di e oportunidad pa brinda informacion tocante patrimonio di Aruba y Coleccion Aruba**

Minister di Cultura, Xiomara Maduro ta informa como parti di e programa di TAROC (Towards a Recommendation for Open Culture), 'Creative Commons' a a organisa dos dia di session pa elabora riba e topico aki na Lisbon, Portugal. Na e sessionnan aki a participa 50 experto riba varios tereno manera ley, maneho, digitalisacion, representantenan di UNESCO Paris y Wikimedia Foundation, e "Open Access Movement". Tambe a participa representantenan di comisionnan nacional pa UNESCO y hopi institucion di memoria y patrimonio. E meta tabata pa traha riba un trayecto pa yega na un recomendacion di UNESCO

pa uzo y aceso liber di materialnan patrimonio cultural, mas tanto den un forma digital(isa). E mandatario ta sigui informa cu Cultura Habri tin un papel esencial den conecta hende di diferente cultura y fomenta un ambiente di inclusion y diversidad. E ayuda crea un comunidad global caminda hende por comparti y aprecia herencia cultural di diferente parti di mundo. E re-uso creativo di e herencia cultural ta stimula creatividad y innovacion, asina permiti pa crea productonan cultural nobo y inspirativo. E expertonan global cu a participa den e discusionnan a enfatisa e importancia di Cultura

Habri pa reforsa resiliencia social y pa fomenta un ambiente di comparti conocimiento y experiencia.

Sr. Peter Scholing como un experto for di un isla chikito, investigado na Biblioteca Nacional di Aruba y actual Presidente di e Comité Regional Latinoamerica y Caribe di e Programa Memoria di Mundo (Mowlac) di Unesco tambe a wordo invita na e sessionnan. Hunto cu expertonan di di varios otro pais manera Merca, Canada, Australia, Indonesia, Maroco, Qatar, Uruguay, Mexico, Inglatera, Italia, Hulanda, Alemania y India, Aruba tambe tabatin un voz pa intercambia di



opinion y discuti tocante di Cultura Habri. Durante e sessionnan aki, Sr. Scholing a haci uzo di e oportunidad pa comparti su experiencia y brinda informacion tocante Coleccion Aruba y e trabounan cu Aruba ta haci pa conserva nos herencianan cultural haciendo uzo di tecnologia. Alabes como pionero den e region Caribe ta promove

e plataforma di e herencia digital pa ta un modelo pa implementa den region por medio di cooperacion mutuo.

Minister di Cultura ta gradici Sr. Scholing pa e bon trabou cu e ta haciendo representando Aruba y tambe promoviendo e portal di herencia cultural Coleccion.aw.



# Prome Minister Evelyn Wever-Croes: Cu 11 voto pro y 7 contra, PARLAMENTO DI ARUBA A APROBA E LEY DI E PRIVATISACION DI RWZI

## RWZI ta un di e retonan mas grandi cu Aruba tin despues di e pandemia di covid

Diahuebs 30 di mei durante un reunion publico di Parlamento di Aruba, a trata e ley di privatisacion di RWZI. E ley aki ta trata e privatisacion di e 3 RWZI (Rioolwaterzuiveringsinstallatie), Bubali, Parkietenbos y Zeewijk, y e incinerator na Parkietenbos cu awor lo bay den man di Aruba Wastewater Sustainable Solutions NV.

Cu 11 voto pro y 7 contra, Parlamento di Aruba a aproba e ley di e privatisacion di RWZI. Partidonan den oposicion AVP y MAS y Parlamentario Independiente Gerlien Croes a vota contra.

Prome Minister durante e reunion a remarca cu e problema di RWZI ta un di e retonan mas grandi cu Aruba tin despues di e pandemia di covid y e ta un problema cu ta afecta tur ciudadano di Aruba, y cu e ley aki di e privatisacion esaki lo wordo solucionaria.

Minister Ursell Arends di Transporte, Integridad, Naturalesa, Asunto di Adulto Mayor a

compromete su mes desde cu el a forma parti di Gabinete Wever-Croes II, pa busca un solucion pa RWZI. E proceso aki no tawata facil pero e no a laga nada strob'e na caminda.

E prome paso tawata pa sondea con por yega na un solucion. A purba tur manera pa esaki keda den man di Gobierno y hasta a purba inclui e suma den e presupuesto pa inverti den e planta, pero esaki no tawata posibel. Una bes cu a explora tur opcion, y a exclui tur otro solucion, el a yega na e conclusion cu mester privatisa. Di akinan e siguiente paso tawata pa explora con pa privatisa y den man di ken.

Na e momento ey a haci un apelacion na Minister Glenbert Croes di Labor, Energia y Integracion, Utilities a wordo involucra pa yuda busca un solucion pa e problema critico aki. Akinan sin duda, Minister Croes a yuda sondeando companianan estatal cu ta resorta bou di su ministerio. Sabiendo e riesgo y responsabilidadnan cu e planta actual tin, su persona hunto cu Utilities a busca un solucion.



Akinan a lanta un stuurgroep, consistiendo di representantenan di e tres ministerionan: Ministerio di Transporte, Integridad, Naturalesa y Asunto di Adulto Mayor, Ministerio di Labor, Energia y Integracion y Ministerio di Asunto General, Innovacion, Organizacion Gubernamental, Infraestructura y Planificacion Teritorial, unda DOW tawatin un papel hopi importante. Tambe DWJZ a forma parti di e stuurgroep pa locual ta trata e ley. A apunta señor Jossy Figaroa como lider di e grupo aki.

“E privatisacion di RWZI ta pa yega na un solucion pa Aruba, no pa Utilities, no pa DOW, no pa ningun

minister. E solucion cu awe ta riba mesa ta pa Aruba, y tur ciudadano di e pais aki ta sclamando pa un solucion, y diahuebs nos a presenta na Parlamento e resultado final. Di curason mi kier gradici mi coleganan Minister Ursell Arends y Minister Glenbert Croes, y tur e profesionalnan cu a yuda nos pa awe nos por a yega unda nos ta. Tambe na miembronan di e stuurgroep cu a bin cu e solucion y a traha incansablemente te ora a logra. Tawata un reto grandi cu hopi obstaculo na caminda y mi ta contento cu awor nos ta asina leu”, Prome Minister a expresa.

## POSESION PORNOGRAFIA INFANTIL



Ministerio Publico a tuma nota di un video cu ta circula riba social media riba cual aparentemente por wak cu dos persona menor di edad posiblemente involvi den un acto sexual. E video aki supuestamente ta wordo comparti via WhatsApp.

Posesion di pornografia infantil

ta castigable.

Ley ta bisa cu un persona cu intencionalmente plama, ofrece, exhibi, adkeri, tin den su posesion of tin acceso na un imagen di actonan sexual den cual un persona menor di edad ta involvi, ta castigable cu un castigo di prison di maximo 4 aña of un multa.

### Clasificados

SOLODIPUEBLO@GMAIL.COM  
CEL. 585 9500





# NoticiadiCorte

## Colombiano ilegal condena na 1 año y 6 luna di prison **CACHO DI DOUANE A PARA TRAFICACION DI COCAINE SCONDI PA AUSTRALIA**

Awe mainta Corte di Husticia a trata e caso penal cu Ministerio Publico a cuminsa contra e homber Colombiano J.A.Z.R.(38), kedando ilegal na Aruba.

SOLO DI PUELBO por a compronde cu cacho anti droga di Douane a haya 795 gram di cocaine scondi den un pakete na Postkantoor cu tabata destina pa Australia y cu J.A.Z.R. ta esun responsabel pa esaki.

E acusacion cu Fiscal a presenta contra J.A.Z.R. ta cu entre 1 di November 2023 te 1 di December 2023 hunto cu otro nan a exporta y tabatin den posesion cocaina.

### TRAFICA COCAINA

Durante tratamiento di e caso, J.A.Z.R. a admiti y a bisa cu el a haci un fayó grandi di exporta droga. Hues a mostra cu segun e raport di Douane, dia 1 December 2023 a haci control di rutina riba paketenan di post na Postkantoor y cacho anti droga a reacciona riba un pakete. E pakete tabata destina pa Australia. Den e pakete tabatin 8 paar di slof cu tabata pisa mas cu normal. A bora un slof y a constata cu tin cocaine den e zool. A entrega nan na Polis. Investigacion a mostra cu den zool di e slofnan en total a confisca 795 gram di cocaina. A detene e persona A.v D. cu su nomber tabata skirbi riba e pakete. Hues a puntra J.A.Z.R. pakico el a manda A.v D. y no e mes a bay hiba e pakete. J.A.Z.R. a bisa cu el a conoce A.v D. na

trabao y el a pidi A.v D. haci'e e favor pa manda e pakete. E no a bisa A.v D. cu tin droga den e pakete.

Despues di basta investigacion Polis a yega na e apartamento di J.A.Z.R. caminda a haya 50 gram di cocaina. J.A.Z.R. a bisa cu e droga ta di dje. Durante interrogacion na Polis, el a bisa cu un hende di Cali, Pipe, a pidi'e manda un pakete cu slofnan cu ta yena cu cocaina. Segun J.A.Z.R. el a djis haci un favor y no a pidi ni a haya placa. Hues a haya esaki straño. J.A.Z.R. a bisa cu el a pensa cu den futuro e lo por pidi. Hues a bisa cu A.v D. a bisa cu J.A.Z.R. a priminti'e 300 florin pero solamente a paga 150 florin. Segun J.A.Z.R. un latino cu tabatin e pakete, a dun'e e pakete y 300 florin pa paga e post. E placa cu A.v D. a haya ta loke a resta di loke cu e mester a paga pa manda e pakete Australia.

### FISCAL

Fiscal a bisa cu e ta haya legalmente proba cu J.A.Z.R. a exporta cocaina. Pa cu e castigo, Fiscal a bisa cu e ta tene cuenta cu droga ta malo pa salud y comunidad en general. El a bisa cu Ministerio Publico no kier pa ta exporta droga for di Aruba. Fiscal ta considera J.A.Z.R. un intermediario den e traficacion y Pipe ta e cabez cu ta organiza esaki. Fiscal a exige 24 luna di prison. El a bisa cu despues di caba di sinta su castigo, J.A.Z.R. lo wordo saca for di Aruba.

### ABOGADO

Mr. Carlo a bisa cu J.A.Z.R. a admiti y ta castigabel. E abogado a bisa Hues cu J.A.Z.R. a bin Aruba pa traha. E tabata traha di mainta te atardi y despues anochi. Den esey un persona di Cali cu sa cu J.A.Z.R. ta na Aruba, a busca un chens. E abogado a bisa Hues cu J.A.Z.R. a bay purba su suerte y tabata bobo pa haci'e. El a bisa cu e famia di J.A.Z.R. ta hopi sera y e tata a bin special di Colombia pa sostene su yiu. E abogado a pidi Hues pa duna un castigo combina. Segun e abogado, si duna un parti condicional, J.A.Z.R. lo bay Colombia y lo bay regla su papelnan pa por bin legal Aruba. E ora ey e tin presion riba su cabez di castigo condicional cu e no por faya mas.

### SENTENCIA

Hues a sera tratamento di e caso y a bay pensa un rato promer cu e tuma un decision. Despues di un rato, Hues a bolbe y a dicta sentencia di biaha. Hues a bisa cu e ta haya legalmente proba cu J.A.Z.R. a exporta cocaina y tabatin 50 gram den su poder. Hues a bisa cu e ta tuma J.A.Z.R. hopi na malo cu a involvi un hende inocente den esaki. Hues a bisa cu ta dificil pa e kere cu J.A.Z.R. no a haya pago pa haci esaki. Hues no ta haya cu mester duna castigo condicional. Hues a condena J.A.Z.R. na 18 luna di prison, kitando e lunanan cu e ta sera den KIA.

## LADRONNAN TA SIGI KIBRA Y DRENTA HORTA FOR DI AUTO DEN ORANJESTAD

Diaranson anochi a drenta informe di un caso di kiebri cu ladronia for di un auto stacion den parkinglot di Oranjestad, mesora a dirigi un patrulla na e sitio.

Na yegada di e patrulla a bin compronde cu e ladron a logra bay cu algun pertenencia pero e gasho di e bentana kibra ta mas di locual nan a bay cun'e.

Polis a tuma e keho di kiebri cu ladronia for di auto





Minister Endy Croes:

**PUEBLO DI ARUBA TA INVITA PA BIN APOYA NOS  
MUCHA- Y HOBENNAN NA E APERTURA DI WEGANAN  
ESCOLAR 2024 DIASABRA, 1 DI JUNI**

E gran apertura ta inicia 6 or di atardi na Stadion Nadi Croes y Crismo Angela.



E aña aki 1300 alumno di 45 scol preparatorio, basico y secundario cu a cualifica lo competi contra otro pa konkista e titulo maximo. E participantenan lo competi den diferente disciplina entre otro, beach tennis, volleyball, futbol, badminton, “kids athletics”, We Baile y We Mente. Minister Endy Croes y IBiSa ta invita e comunidad di Aruba pa bin apoya nos streanan di mañan durante e competencianan di Weganan Escolar 2024.



: E evento deportivo tan spera pa nos mucha- y hobennan ta tuma lugadiasabra awo, 1 di juni 2024. E gran apertura di Weganan Escolar 2024 ta inicia 6 or di atardi na Stadion Nadi Croes y

Crismo Angela cu desfile di 45 scol, show di baile di NTG & NLG dirigi pa Marisol Peña, presentacion di Gihae Gymnastics Aruba, entretenimento di brassband y entrega di antorcha Olimpico.



# DISTRICT 35N

Florida – Bahamas – **ARUBA**  
Bonaire – Curaçao

**PRESENTS**

## LIONS 5K FUNRUNWALK 2024



**HONORING OUR FOUNDING FATHER  
MELVIN JONES**

DATE	TIME	START & FINISH	FEE
SAT <b>15<sup>TH</sup></b> JUN	7:00 AM	EAGLE BOARDWALK COSTA LINDA PARKING SPACE	AWG <b>25</b>

**ALL AGES**

GAMES \* PRIZES \* GOODY BAGS \* PHOTO BOOTH



**SUPPORT OUR GLOBAL CAUSES**







# TRANSICION DI LIDERAZGO NA PFTSA: MARION AGUNBERO TA BAHAM Y NATALIA LACLE TA BIRA MANAGING DIRECTOR NOBO



Despues di casi cuater aña y mey manera Director Ehecutivo na PFTSA, Pension Fund Tourism Sector Aruba, Marion Agunbero ta retira lagando Pension Fund Tourism Aruba den man di Natalia Lacle, cumisando 1 di juni 2024. Desde cu el a join PFTSA na 1 di november 2019, Agunbero a traha hopi di cerca cu miembronan di e hunta ehecutivo, coleganan na oficina, y e fondo su tanto stakeholders.

Mientras cu el a eherce su rol, Agunbero a enfoca riba desaroya e organisacion cu un update, implementacion di un structura di 'good governance' di cual tres diferente comision a keda introduci e tempo ey. Esaki tabata pa facilita e proceso di inversion,

audit y Risk & Compliance. PFTSA despues a apunta Compliance & Risk Officers asigna pa monitoria e areanan aki den un esfuerzo continuo pa sigui cumpli cu rekesitonan regulatorio.

Cu e asistencia di conseheronan externo, varios beleid y procedura a keda implementa y mehora. Durante e tempo aki, e reto di mas grandi pa PFTSA tabata e pandemia, cual tabata tin un impacto grandi riba economia di Aruba y sector financiero den su totalidad. Accion inmediato a keda tuma pa asina e fondo por wanta e presion aki y salvaguardia su posicion financiero, manteniendo su mes consistente riba e rekesitonan regulatorio rekeri. Despues di pandemia, PFTSA a emplea mas hende y upgrade nan structura salarial, aumentando e nivel di profesionalismo y personal di fondo.

Agunbero ta raporta cu den cooperacion cu otro companianan di pension na Aruba, PFTSA a tene varios discusion largo cu Banco Central y otro entidadnan gubernamental pa elimina cierto beleid sectoral pa habri e mercado di pension na un nivel mas 'playing field.' Bao e liderazgo aki, desde



2019, PFTSA a mira un crecimiento satisfactorio di 1,930 participante cu a join e fondo representa pa 30 compania local.

Awe PFTSA ta opera a base di un Strategic Investment Policy cual ta e base di su beleid actual di inversion, guiando tur otro decision di inversion. E plan strategico di 2024-2026 tabata aproba pa e hunta ehecutivo anto implementa. E plan ta set e vision pa un fondo den e siguiente añanan. "Mi ta hopi sigur cu PFTSA su team actual lo sigui haci un tremendo trabao den guia e fundo y provee servicio personal, profesional y amabel na miembronan, bao direccion di Natalia Lacle," segun Agunbero.

Lacle a join e fondo na october 2020 como un Pension Manager. E ta trece cu ne un background bastante robusto den loke ta seguro hunto c'un fundacion educacional y conocimiento amplio den loke ta institucionnan, specialisa den Risk Management, Compliance y mucho mas. Posicionando su mes manera un lider ideal p'e organisacion di PFTSA, sigurando un transicion ameno entre e directornan ehecutivo saliente y esnan cu ta bini awor na funcion.

PFTSA a host nan General Assembly anual den forma di un Zoom meeting invitando tur miembro di PFTSA pa sign-in digitalmente. E meeting tabata lidera pa ambos directornan ehecutivo saliente y esnan actual, Marion Agunbero y Natalia Lacle, modera pa Shrayelle Giel. PFTSA a wordo funda na 1992 manera un iniciativa di Aruba hotel and Tourism Association y sindicato FTA, mirando cu ambos tabata comparti e mesun vision den loke ta e necesidad pa crea un plan di pension cu lo brinda trahadonan den industria di turismo un entrada adicional despues di retira, riba di e pension general di biehes brinda pa gobierno.

## TURISTA CU UTV A PERDE CONTROL BAY DAL DEN MONDI KEDA SPIN Y KEDA MEY MEY CAMINDA

Diaranson atardi a drenta informe di un accidente na crusada di Ayo Rock Formation, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda un turista manehando un UTV a perde control drenta mondi keda spin y bay para meymey di caminda. Afortunadamente ningun hende a resulta herida.





## Minister Rocco Tjon: CUERPO POLICIAL DI ARUBA TA WORDO FORTIFICA CU SEIS COLEGA NOBO



Cuerpo Policial di Aruba ta un organisacion den desaroyo, caminda e structura di e organisacion ta bay wordo adapta y di e forma ey, brinda tur esnan cu ta traha den e organisacion aki, un carera mucho mas largo y mas miho.



- Diahuebs merdia, durante un momento importante y bunita, den presencia di coleganan y nan famianan, Minister di Husticia y Asuntonan Social sr. Rocco

Tjon, conhuntamente cu Korpschef sr. Ramon Arnhem a huramenta seis colega nobo cu ta bay forma parti di Cuerpo Policial di Aruba.

Cuater persona cu a huramente ta bay yuda den e “ondersteunende processen” manera “bedrijfsvoering” y HR. E procesonan aki ta hopi importante pa por asisti esnan cu ta traha den uniformdienst of recherchedienst, pa nan por ehecuta nan trabou mucho mas miho y di e forma ey, brinda seguridad.

Locual a wordo treci padilanti ta pa



recorda tur esnan cu a huramenta, pa mantene nan mes na locual nan a huramenta p’e, manera “geheimhoudingsplicht”. Un pabien grandi na Cuepro Policial di Aruba,

kende a wordo fortifica cu seis colega cu lo percura pa Cuerpo Policial por brinda un servicio aun mas miho y sigui garantisa seguridad den nos comunidad.

### IBiSA ta informa:

## DIA MUNDIAL DI NO TABACO – 31 DI MEI

### Vaping ta miho cu sigaria?

Na Aruba vaping ta creciendo particularmente bou di e generacion jong. Esaki a keda comproba den e ultimo encuesta di salud nacional STEPS 2023. Un cantidad di 10.5% den e edad di 18-29 aña ta haci uzo di e-cigarettes. E-cigarettes ta un aparato cu ta traha riba bateria cu ta bin den diferente forma: parecido na sigaria, pen of un aparato sofisticado y atractivo. Uzadonan ta inhala un vapor cu sabor di fruta y ta saca un ‘huma’ parecido na sigaria.

Hopi hende ta pensa cu vaping ta menos dañino cu humamento.

Aunke cu ta berdad cu huma di vape tin menos contaminacion cu tabaco, toch e no ta safe. E nicotina den e e-cigarettes ta peligroso pa e uzado y e hendenan rond di dje. Nicotina ta adictivo y por afecta e cerebro di mucha y hoben. Tambe e por afecta e baby den barica di mama cu ta vape.

Banda di nicotina e-cigarettes ta contene tambe diferente substancianan peligroso manera diacetyl. Diacetyl ta un kimico cu por causa malesanan di pulmon serio. Banda di esaki e ta contene

metalnman manera nikel y chumbo y kimiconan cu por causa cancer. E likido cu ta wordo uza den e e-cigarettes por ta hopi peligroso, mucha y adulto a venena dor di guli of hole esaki.

Companionan di tabaco ta gasta mas cu \$8.2 bion na mercadeo agresivo pa aña cu ta mas cu \$22 miyon pa dia! Ban para fuerte den nos sapato y no laga e propagandanan di tabaco influencia y gara un generacion nobo di humado y adictonan na nicotina.


Humamento ta y ta keda un peliger



pa salud, sea den forma di sigaria, siga, tabaco di kauw of den un forma mas moderno y sofisticado cu ta via vaping.



# DAMA HULANDES-EUROPEO KIER A HACI TRABAJO DI NARCO-GALIÑA PERO DESPUES DI A GULI BASTA BOLITA ELA BIRA HOPI MALO TE BAY HOSPITAL CU URGENCIA



Diahuebs madruga a drenta informe di cu na Westpunt un dama cu tabata guli bolitanan di droga a bira basta malo, mesora a dirigi tanto polis como ambulans na e sitio. Na yegada di e patruya ya caba ambulans tabata na e sitio y tabata atendiendo

e dama hulandes europeo cu tabata guliendo e bolitanan di droga pero na dado momento ela bira malo y mester a hib'e cu hopi urgencia pa hospital.

Bao sirena ambulans escolta pa polis a bay hospital cu e muhe aki.

## CELEBRACION FIESTA DI CORPUS CHRISTI, PAROKIA BIRGEN DI FATIMA DAKOTA

Corpus Christi ta e fiesta di e Curpa y Sanger di Cristo, di e presencia real di Cristo den Eucarestia. E ta un fiesta cu ta wordo celebra desde siglo XIII. Cu e fiesta aki nos ta conmemora e institucion di e Santa Eucarestia ariba diahuebs Santo y nos ta duna tributo publico y solem di adoracion, amor y gratitud. E ta un fiesta hopi importante ya cu Eucarestia ta e regalo di mas grandi cu Dios a duna nos pasobra E tabata desea di keda cu nos, tambe despues di Su Ascencion na Shelo. Manera semper nos parokia lo celebra Corpus Christi na un manera special. Reverendo Pastoor Jozef Pelc y Reverendo Di-

acono Michael Nicolaas ta invita tur parokiano, gruponan di oracion y pueblo di Aruba en general pa asisti na e ceremonia y celebracion solem aki diadomingo awor, 2 di juni 2024, na Misa Birgen di Fatima Dakota. Tene cuenta cu e Santo Sacrificio di Misa ta cuminsa pa 5'or di atardi sigui pa un proseshon den cayanan di Dakota y terminando bek na misa. Lo reza e Santo Rosario pa 4'or y 15 di atardi. Cu un fe firme den Señor nos Dios, e Celebracion lo tin un influencia positivo riba nos bida spiritual, social, cultural y politico. Bin pa nos manifesta nos fe den Señor Hesus den Santisimo.

## Maravillas de la Fe

Bo ta sufri di un malesa nan cu no no por cura? Manera artrosis, Alzheimer, demencia, depresión, diabetes osteoporosis, párkinson, insomnio, dolor di barica, weso migren dolo di barica, dolo di wesu, lomba, ect? Bo ta bebe remedi i bo no ta cura? Bo ta victima di bruheria? comunica na MARAVILLAS DE LA FE na 748 56 71

Bo no tin suerte? bo placa no ta jega? Bo ta cumpra number i bo no ta gana? Bo ta bai casino i perde tur bo placa? Invidia, mala suerte? comunika na 748 56 71

Bo tin problema di amor? Bo pareha ta gaña bo? Fracaso, soledat, angustia. comunika na

Comunica na 748 56 71




748 56 71





# HOBENNAN CU TA USA DROGA TA SIGI AUMENTA Y TA BIRANDO UN PROBLEMATICA INCONTROLABLE



Droga ta dañá bo cerebro y bo mesun mayornan tambe ta sufri. Diahuebs



merdia a drenta informe di cu un yiu cu na varios ocasion a lanta contra su mama a bolbe lanta contra di dje y ta menasa di causa un daño.

Mesora a dirigi un patruya

na e sitio. Na yegada di e patruya a bin compronde cu e yiu ta menasa su mama ya cu no ta dun'e placa pa e cumpra su droga. Polis a detene y a hib'e na recherche cual a duna ordo di su detencion.

## Polis a bay companashi pa papia cu yiu cu ta yega y sali ora e kier n'e cas di su mayornan

Diahuebs madruga a drenta informe di un problema familiar unda un mayor a pidi polis pa bin papia cu

su yiu cu ta yega cas y sali bay ora cu e kier pa splik'e cu e no por sigi haci esey y cu na cas tin regla y mes-

ter cumpli cu esakinan. Polis a haci su maximo esfuerzo pa bisa e yiu pa e compronde regla y respet.

## Polis a bay controla un auto sospechoso para pabao di Parke Curason Jaburibari

Diahuebs madruga a drenta informe di cu tin un auto sospechoso para pabao di Parke Curason Jaburibari, mesora a dirigi un patruya na e sitio. Na yegada di e patruya a bin encontra cu un persona drumi den auto polis a lante y a bin compronde cu e tabata sinti un poco cansa y a para e auto pa e relax y recupera pa djey sigi su caminda pa cas. Polis a bis'e sosega un rato mas y bay su cas.



### TA BUSCA PARTIDORA DI

### CORANT PA AREA DI

Simon Antonio - Pos Chikito


Brazil - Sanicolas

**Horario: 7.30 pm**

Contact: 585-9500

E-mail: [solodipueblo@gmail.com](mailto:solodipueblo@gmail.com)





# Fasting of Yuna: Ta bon pero no pa tur hende



Ultimamente hendenan ta poniendo mas atencion na comemento, y no ta pa menos, ya cu e cantidad di porcion di cuminda cu nos ta consumi ta hunga un papel clave den e prevencion di e desaroyo di algun malesa cronico.

Tocante esey, e Instituto Nacional di Diabetes y Malesnan Digestivo y Renal (NIDDK na Ingles) na Merca ta señala cu, na prome luga, mester tin cla e diferencia entre e cantidad y e tamaño di un porcion.

“Pa baha peso of mantene bo peso, e cantidad di calorìa cu bo mester pa dia ta depende di bo edad, peso, metabolismo, si bo

ta hende muhe of homber. Tambe ta depende di cuanto actividad fisico bo ta haci y otro factornan,” asina e instituto Mericano ta indica.

## YUNA

Rozalyn Anderson, profesor asocia di e Facultad di medicina y Salud Publico di Universidad di Wisconsin, a studia e beneficiannan di e restriccion di calorìa. E reduccion di porcion di cuminda ta asocia cu un alimentacion reduci y nivelnan mas abou di hinchamento den curpa.

“Tin un periodo di yuna tur dia por ofrece algun di e beneficiannan aki. Esaki ta cuadra cu e idea cu yuna por pone e curpa den

un estado diferente, den cual e ta mas cla pa drecha y vigila e daño; mescos cu pa elimina e proteina malo”, e ta señala.

Duna e curpa por lo menos 12 ora sin consumi alimenta ta permiti cu e sistema digestivo ta descansá, segun Emily Manoogian ta bisa. E ta un investigado clinico di e Instituto Salk riba Estudionan Biologico (California, Merca).



Algun experto ta argumenta cu come un cuminda so pa dia lo resulta miho.

## NIVEL DI GLUCOSA

Sinembargo, algun especialista ta di otro opinion y no ta recomenda pa haci solamente un cuminda pa dia. E falta di cuminda por aumenta e nivel di glucosa den sanger. E aumento ta sosode ora no ta comiendo, esey ta un fenomeno cu yama glicemia den yuna. Nivelnan halto di glicemia

den yuna durante un periodo largo ta un factor di riesgo pa diabetes tipo 2. Expertonan tambe ta indica cu mantene e nivelnan di glucosa abou ta rekeri come regularmente, kiermen mas di un bes pa dia.

P'esey ta importante precisa cu, aunke ta existi estudionan reciente cu ta señala cu e periodonan di yuna por ta favorable, cada individuo tin su mesun necesidadnan di comemento.

## Invitacion:

# Riba tur prome diasabra di luna tin misa na Kapel Alto Vista di n milage masha grandi y impresionante di solo

Diasabra 7 di october 2023, pa 7 or di mainta tin Santa Misa na Kapel di Alto Vista y Den Kapel di Cas Curason di Maria na San Nicolaas. (Blue Army) Prome cu Santo Eucarestia ta resa Santo Rosario cuminsa pa 6.15 “Misterio Goso”, despues ta sigi cu Salve Regina. Ta invita henter e pueblo, deboto y fielnan pa asisti na e Santa Rosario prome cu misa. Luna di october ta luna di Mama Maria, E ta intersede pa nos na nos Tata Celestial. Tur fielnan di Mama Maria ta bin resa e Santo Rosario pa bienestar di henter comunidad di Aruba. Papa Francisco ta haci un suplica na mundo henter pa resa e Santo Rosario, nos ta den un tempo di crisis grandi, hopi no ta weita cu nos ta den un tempo crucial cu nos no ta mira e fin. Aki na Aruba ya nos ta sinti e Cambio di Clima.. E caliente di e solo ta afecta nos tur dia. Den e tempo aki cu malesanan ta invadi HUMANIDAD. Laga cu nos ta mas conciente cu nos

mester di oracion. Mama Maria a bisa e 3 muchanan di Fatima dia 13 di october, “Ami ta La Birgen di Rosario. Mi a bini pa spierta hende pa drecha nan bida, no haci Dios bira tristo pa via di pica (ya cu Dios ta sufri tanto caba pa pica di hende), resa Santo Rosario tur dia y haci penitencia pa nan pica.” Cu cara tristo y suplicante La Virgen a papia e palabranan cu a haci mas impresion ariba Lucia. “Laga hendenan stop di ofende Dios; ya nan a ofend’E di mas caba.” Na ocasion di delaster aparicion, mas o menos setenta mil hende tawata testigo

Laga nos ta resa pa necesidad di Iglesia Universal, pa Papa Francisco, Obispo Luis Secco, tur sacerdote, Diacono y laiconan cu ta hiba e bon noticia pa e pueblo di Dios. Pa nos Gobernantenan y tur cu ta carga responsabilidad pa nos pais Aruba. Pa enfermonan den exterior cu a bay busca nan salud. Pronto lo ta na Aruba y gosa di un bon salud.

## HOTLINE

744-0444

## CAPT'E Y MAND'E



# TURISTA MASCULINO CU ORA TA BEBI TA BIRA FRESCO A SER PONI PORTA AFO DESPUES DI A INSULTA E DAMANAN NA UN RESIDENCIA



problema cu turista masculino na Bakval, mesora a dirigi un patruya na e sitio. Na yegada di e patruya a bin compronde cu aki ta trata di un turista masculino cu nan a bay atende na un lowrise hotel.

Unda e homber ta bebe insulta y busca problema pero ora ela wak polis ela bira trankilo y mirando



esey polis a lage ayanan. Pero awor ela bini na e residencia unda e ta keda cu mas hende ela bolbe cuminsa cu insultonan y e damanan a sak'e porta afo cu

su maleta ya cu nan bo kier e mas eynan. Mirando cu e ta bebi y e ora polis a bay warda pa e pasa su wayaba y den dia wak unda otro e lo bay keda.

Diahuebs madruga a dren- ta informe di cu tin un

**Clasificados**

Icons: Car, House, Shopping Cart, Briefcase, Wrench, People.

**CLASSIFIEDS**

**SOLODIPUEBLO@GMAIL.COM**  
**CEL.585 9500**

**SOLO Di Pueblo**

**1 JUNI 2024**

**FESTIVAL DI CANTO DERA GAY**

**BAN APOYA NOS MUCHANAN Y HUNTO NOS TA CANTA "DERE GAY DERE GAY"**

CATEGORIA	PREMIO
5 - 7 AÑA	GANADOR ABSOLUTO FL.500,=
7- 9 AÑA	SEGUNDO LUGAR FL.250,=
10 - 12 AÑA	TERCER LUGAR FL.150,=

ORARIO: 6:30 PM - 11:30 PM  
LUGAR: CENTRO DI BARIO BRAZIL  
ENTRADA: FL.10,= PA ADULTO

**ENTRADA PA TUR MUCHA TA GRATIS!**

**OBJECTIVE REALTY ARUBA**

**DEPARTAMENTO DI CULTURA ARUBA**

**BO YU KIER PARTICIPA?**  
TEL: 564 6099 POR INSCRIBI TAMBE NA EMAIL: FUPROCUNO2@GMAIL.COM

**OLIVE TREE'S PRE-PAID FUNERAL PLAN**

**PAY AS YOU CAN**

Piedraplat ☎ 582 0000  
Sanicolaas ☎ 584 8888 | 5820000  
Habri dialuna pa diabierna | 8:00am-4:00pm

Olive Tree Social Department ☎ (+297) 743 7411  
www.olivetreefuneralhome.com



# Accidente pa falta di preferencia na Catiri




Diaranson atardi a drenta informe di un accidente na Catiri, mesora a dirigi un patruya na e sitio. Na yegada di e patruya a bin compronde cu aki ta trata di un accidente pa falta di preferencia entre un Nissan Kicks y un Suzuki. Afortunadamente ningun hende a resulta herida.



# Auto a crusa dilanti motociclista y esaki a desvia pa evita e impacto pero toch nan a dal otro



Diaranson atardi a drenta informe di un accidente na Hooiberg, mesora a dirigi un patruya na e sitio. Na yegada di e patruya a bin compronde cu un auto Toyota Yaris a crusa dilanti un motociclista sin rijbewijs y esaki pa evita un fuerte impacto a purba desvia pero e impacto tabata inevitable y nan a dal toch. Afortunadamente ningun hende a resulta herida.




			8		1			
						4	3	
5								
				7		8		
						1		
	2			3				
6							7	5
		3	4					
			2			6		

		1	2			6		
	7			9	6		4	8
	6	8		5	4		2	
7	5			4				2
	9		6	8		7	5	
8		6	7			9	3	
			5	1	9		8	6
1		9			2			
	2	5						9



# Mente ta importante na Centro di Bario Noord



Mei tabata luna di concientisacion di Salud Mental, un tempo pa pone enfasis ariba e importancia di cuida bo mes di bo salud mental tambe un tempo pa comparti recursonan valioso y haya sa unda por haya cuido y apoyo pa bo salud mental.



Ariba 15 di Mei ultimo, Dia International di Famia, Centro di Bario Noord den partnership cu Fada a organisa un charla interactivo riba e topico Salud Mental. Un charla super

informativo na unda Sra Rubiela Toppenberg di Fada a papia, splika y ilustra e 6 tiponan di desorden mental. A duna tipsnan pa mantene un salud mental balansa.



## TE HUUR prime lokatie

Kantoorryimte beneden-verdieping 90 m2 te L.G. Smith Boulevard 22 vanaf 1 juli a.s., Huurprijs n.o.t.k.

Voldoende parkeerruimte

Te bevragen  
bij **5824417**  
t.a.v. Prisca Sapuana of  
Sapuanap@kloeslawyers.com

**CELEBRANDO 38 AÑA DEN RADIO  
DIFUSION DI CECILITO LOPES**

**GRAN FESTIVAL  
DI RANCHERA**

**1 JUNI 2024 | 8.30PM**

**CLUB CAIQUETIO**

**ENTRADA GENERAL: FLS 35,-**

**LO BAI TIN HOPI DOORPRIZES #ANDALE ANDALE!**



# FORTALEZA PA FAMIA

Scirbi pa Pastor Marcel Balootje.

## E PRESENCIA DI DIOS TA TUR COS DEN NOS BIDA

Hende ta anhele hopi cos, tin ta anhele pa gana Lotto, anhele poder, anhele fama, anhele grandesa pa nan mes, anhele y adora placa, pero no tin nada mas precioso ora nos curason ta anhele e presencia di Dios.

Den e presencia di Dios tin libertad, tin goso, ningun hende no por gaña, nada impuro no ta drenta den e presencia, curason limpi, y consenshi limpi ta instrumento nan pa wordo usa pa drenta den presencia di Dios. Pasobra eyden solamente berdad ta prevalese, ningun hende no por disfrasa den Dios su presencia pasobra ta para scirbi den 2 Timoteo 2:19: Señor conoce esnan cu ta di dje, laga tur esnan cu ta menciona e nomber di Señor abstene di maldad.

E presencia di Dios ta trece diferencia den nos bida, e ta cambia cualkier situacion, e ta kita malesa y enfermedad, e ta trece liberacion, pasobra e enemigo no por cu e presencia di Dios, e presencia

di Dios ta trece pas, goso, gracia, y e presencia di Dios ta yen di misericordia.( Exodo 33:14-15). Ki bunita riba e serunan, ta e pianan di esnan cu ta trece e bon nobo,cu ta anuncia pas,y ta trece bon nobo di felicidad, cu ta anuncia salvacion, y cu ta bisa Sion bo Dios ta reina. ( Isaías 52:7).

Awor cu nos ta na bida, nos mester busca e presencia di Dios, pasobra ora nos muri nos lo ta den Su presencia, pa sina Dios dicidi na unda nos lo bay, si nos a scohe pa su Yiu Cristo Hesus,nos lo tin bida eterna, esaki ta un cos cu tur hende mester sa, ( Juan 3:16-19). Pero si nos a scohe pa bagamunderia y mentira, inmoralidad, abominacion, impuresa , violencia y maldad, nos lo cosecha morto eterno.( Revelacion of Apocalipsis 20:15).

No tin nada riba mundo cu por imita e presencia di Dios, pasobra nos tur sa cu e rey di imitacion y mentira cual ta e diabel,awendia kier purba imita tur cos, pero e presencia ta santo , y diabel no tin nada di haci cu santidad.Eynan su careda a caba.

E Spirito Santo di Dios ta hiba nos den e presencia di Dios, cual ta un experiencia, puro santo y berdadero, caminda no tin comtaminacion, caminda carnalidad tin cu para keto, pa santidad prevalere.

Tin hopi hende ta anhele pa laga atras gran herencia financiero pa nan yuinan, hopi placa pa hende pleita pe, bringa, hiba otro corte, lastra otro, pero ora nos siña nos yuinan con pa drenta den e presencia di Dios, nan lo abunda den tur rikesa.

Nos oracion haci den nos lugar secreto ta hiba nos den e presencia di Dios, y Dios lo bendiciona nos den publico, pasobra cosnan cu no por wordo logra den presencia di hende, pasobra ta hende ta dicidi, ta wordo logra den presencia di Dios, caminda tur cos ta posibel.

Mateo 6:33 ta siña nos : Ma busca prome e reino di Dios y su husticia, y tur e cosnan aki lo wordo añadi na boso.



















Na unda mi por bay for di Bo Spirito? Of na unda mi por huy bay for di Bo presencia?Si mi subi na cielo, Bo ta eynan , si mi habri mi cama den Seol mira, eynan tambe bo ta! Si mi tuma hala di marduga,y si mi bay biba den e partinan mas aleha di laman.Ayanan Bo man
















lo guiami, y Bo man drechi lo cohe mi tene.( Salmo 139:7-10).

E presencia di Dios mester ta prioridad pa nos bida, cas, matrimonio, educacion di nos yuinan.

Sinceramente Pastor Marcel Balootje.



<div></div> <div>Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado : Sorteo 30 Mei 2024 Anochi</div>				
<div></div> <div>Sorteo # 8255</div> <div>0880</div> <div>7948</div> <div>3728</div> <div></div> <div>X2</div> <div></div> <div>Sorteo # 7299</div> <div>3635</div> <div></div> <div>FP</div> <div></div> <div>Sorteo # 2004</div> <div>5460</div> <div></div> <div>Sorteo # 6058</div> <div>8135</div> <div>Tauro</div> <div></div> <div>Sorteo # 988</div> <div>533</div> <div></div> <div>FP</div>	<div></div> <div>Sorteo #</div> <div>0 x Jackpot</div> <div>0 x Match 4+</div> <div>0 x Match 4</div> <div>0 x Afl. 12,00</div>	<div>Joker</div> <div>Letter</div> <div>Proximo Jackpot</div> <div>120.000,-</div>	<div></div> <div>01-07-21-26-27</div> <div>Sorteo # 6487</div> <div>0 x Jackpot</div> <div>8 x Match 4</div> <div>154 x Afl. 8,00</div>	<div>Proximo Jackpot</div> <div>78.000,-</div>
<div></div> <div>Sorteo #</div> <div>0 x Jackpot</div> <div>0 x match 4</div> <div>0 x Afl. 500,00</div> <div>0 x Afl. 50,00</div> <div>0 x Afl. 15,00</div>	<div>Mega Ball</div> <div>Proximo Jackpot</div> <div>650.000,-</div>	<div></div> <div>Afl. 925.000,-</div>		
<div></div> <div>Sorteo #</div> <td colspan="3"><div></div></td>	<div></div>			

<div></div> <div>Paardenbaaistraat 10, Oranjestad, Aruba Tel.: (297) 525 - 7555 www.lottoaruba.com Resultado : Sorteo 31 Mei 2024 Merdia</div>				
<div></div> <div>Sorteo # 4282</div> <div>4552</div> <div>9521</div> <div>2491</div> <div></div> <div>X2</div> <div></div> <div>Sorteo # 4282</div> <div>1864</div> <div></div> <div>X2</div> <div></div> <div>Sorteo # 2338</div> <div>3635</div> <div></div> <div>Sorteo # 4282</div> <div>3814</div> <div>Capricornio</div> <div></div> <div>Sorteo # 1156</div> <div>407</div> <div></div> <div>X2</div>		<div></div> <div>Sorteo #</div> <div>0 x Jackpot</div> <div>0 x Match 4+</div> <div>0 x Match 4</div> <div>0 x Afl. 12,00</div>		<div>Joker</div> <div>Letter</div> <div>Proximo Jackpot</div> <div>120.000,-</div>
<div></div> <div>Sorteo #</div> <div>0 x Jackpot</div> <div>0 x Match 4</div> <div>0 x Afl. 8,00</div>		<div>Proximo Jackpot</div> <div>78.000,-</div>		
<div></div> <div>Sorteo #</div> <div>0 x Jackpot</div> <div>0 x match 4</div> <div>0 x Afl. 500,00</div> <div>0 x Afl. 50,00</div> <div>0 x Afl. 15,00</div>		<div>Mega Ball</div> <div>Proximo Jackpot</div> <div>650.000,-</div>		
<div></div>		<div>Afl. 925.000,-</div>		
<div></div> <div>Sorteo #</div> <div></div> <div></div> <div></div> <div></div>		<div></div>		